

EPISTOLA B. JOANNIS APOSTOLI TERTIA

Senior Gajo carissimo, quem ego diligo in veritate. ² Carissime, de omnibus orationem facio prospere te ingredi, et valere sicut prospere agit anima tua.

³ Gavisus sum valde venientibus fratribus, et testimonium perhibentibus veritati tuæ, sicut tu in veritate ambulas. ⁴ Majorem horum non habeo gratiam, quam ut audiam filios meos in veritate ambulare. ⁵ Carissime, fideliter facis quidquid operaris in fratres, et hoc in peregrinos, ⁶ qui testimonium reddiderunt caritati tuæ in conspectu ecclesiæ : quos, benefaciens, deduces digne Deo. ⁷ Pro nomine enim ejus profecti sunt, nihil accipientes a gentibus. ⁸ Nos ergo debemus suscipere hujusmodi, ut cooperatores simus veritatis.

⁹ Scripsissem forsitan ecclesiæ : sed is qui amat primatum genere in eis, Diotrophes, non recipit nos : ¹⁰ propter hoc si venero, commonebo ejus opera, quæ facit, verbis malignis garriens in nos : et quasi non ei ista sufficient, neque ipse suscipit fratres : et eos qui suscipiunt, prohibet, et de ecclesia ejicit. ¹¹ Carissime, noli imitari malum, sed quod bonum est. Qui benefacit, ex Deo est : qui malefacit, non vidit Deum.

¹² Demetrio testimonium redditur ab omnibus, et ab ipsa veritate, sed et nos testimonium perhibemus : et nosti quoniam testimonium nostrum verum est.

¹³ Multa habui tibi scribere : sed nolui per atramentum et calamum scribere tibi. ¹⁴ Spero autem protinus te videre, et os ad os loquemur. Pax tibi. Salutant te amici. Saluta amicos nominatim.